

perueniemus. Si autem fuerint separatæ, id quod ex accidentibus ei assimilatur secundum horas particulares unicuique ipsorum attribuemus. Sed illis qui matutinales fuerint attribuemus primitus, illis uero qui uespertinales extiterint posterius. Necessario tamen oportet ut ex principio eis assimiletur. nam si sic se non habuerit, nil futuri facere poterit, cum nullam retinuerit societatem in principio. prima uero dispositio non est occasio futuri temporis, sed qualitas stellæ, quæ respectu Solis & anguli mundi domina dispositionis fuerit tempore natiuitatis.

De fratribus & sororibus. Cap. V.

EX prædictis igitur locum parentum probauimus. locum uero fratrum si quis investigatione generali perscrutetur, & sua perscrutatione quantitatem possibilem non prætereat quæ ad inquirendam notitiam numeri fratrum ueraciter esse potest. Rem fratrum qui eiusdem matris sunt naturali modo scire poterit ex signo mediæ cœli, aut locum matris. locum quidem dicimus in quo Venus in die & Luna fuerit in nocte. At quia signum hoc & signum quod ad ipsum ascendit locus matris sunt quo res filiorum eiusprehendunt, eum locum fratrum esse oportet. Huic ergo loco si planetæ fortunæ in figura associantur, fratrum multitudinem inde iudicabimus, huius autem existimationem rei ex numero istorum planetarum assumemus. Considerabimus etiam si fuerit in signis unius imaginis uel duorum corporum. quod si planetæ infortunæ super hunc locum eleuati fuerint uel eum ex oppositione aspexerint, paucitatem fratrum indicabunt, maxime autem si sol cum eis extiterit. Si uero fuerint in angulis & proprie in ascendente, fuerintque planeta in istorum aliquo locorum existens Saturnus, in uirginibus & maioribus fratribus hoc esse significabit. Si autem Mars fuerit, aliorum fratrum numerum per mortem abbreviabit. Qualitas quidem planetarum qui sunt datores fratrum si fuerit in positione conueniens, fratres potentes & exaltatos existimemus oportet. Si autem in contrarium fuerit, imbecilles erunt & impotentes. At si planetæ infortunæ super datores eleuentur, uel si eos sequantur, breuis uitæ iterum erunt. Masculorum datores sunt planetæ masculini in suis qualitatibus mundi, largitores autem foeminarum, sunt foeminini in suis qualitatibus mundi. Orientales item primos largiuntur fratres, occidentales postremos. Rursus cum in figura largitores associantur signo rem fratrum significati societate conuenienti, fratrum concordiam significabunt, & si cum partes iterum fortunæ conuenerint, fratrum societatem in suis rebus indicabunt. Si uero fuerint in signis nullam ad inuicem societatem habentibus, uel si qualitatem prædictæ qualitati contrariam habuerint, uoluntatem fratrum ad discordiam & inuidiam significabunt, & eos deceptores esse demonstrabunt. Si quis autem unamquamque rem fratrum plura quam supradictum sit, investigando perscrutari uoluerit, satis hoc agere poterit si loco ascendentis largitores planetas constituerit, & tunc omnes eorum res quemadmodum in natiuitatibus facimus obseruauerit.